

CONVOCATORIA DE MOBILIDADES ERASMUS+ PARA PROFESORADO DO CMUS PROFESIONAL DE SANTIAGO DE COMPOSTELA DESTINADAS Á REALIZACIÓN DE CURSOS DE PERFECCIONAMENTO DE LINGUA INGLESA

1. Obxecto da convocatoria:

Convócanse tres (3) prazas de mobilidade Erasmus+ para o profesorado do CMUS Profesional de Santiago de Compostela destinadas á realización de cursos de perfeccionamento de lingua inglesa en Irlanda.

2. Contexto:

A presente convocatoria responde á execución do proxecto Erasmus+ *Camiñando coa música: o camiño continúa*, activo no Conservatorio Profesional de Música de Santiago de Compostela entre o 31 de decembro de 2024 e o 31 de decembro de 2025. Trátase dun proxecto de curta duración KA122-VET, con código 2024-1-ES01-KA122-VET-000240885.

3. Obxectivos:

Os obxectivos do proxecto Erasmus+ especificado no apartado anterior son os seguintes:

- O1: Potenciar a motivación do alumnado, promovendo actividades internacionais no centro ou a mobilidade a centros asociados, para que o alumnado se converta en protagonista do proxecto.
- O2: Seguir potenciando a motivación do profesorado, incrementando o número de participantes con respecto ao proxecto actual planificando actividades máis diversas.
- O3: Ampliar a nosa rede de socios realizando visitas preparatorias, contactando con novos centros e invitando a expertos, para abrir novas fiestras de oportunidades.
- O4: Fomentar, visibilizar e difundir a importancia da música de cámara entre o alumnado do noso centro, mediante a realización de actividades directamente relacionadas con ela.
- O5: Incrementar o número de concertos e actividades que promove o conservatorio, para aumentar a nosa visibilidade, a captación de alumnado e conseguir unha sensación xeral de orgullo.

A presente convocatoria incide especialmente na consecución dos obxectivos xerais O2 e O5.

4. Mobilidades:

4.1. Destino: todos os cursos deberán realizarse en institucións da República de Irlanda.

4.2. Duración: as mobilidades terán unha duración total de 7 días, divididos en 5 días lectivos e 2 días de viaxe. Os 7 días de duración das mobilidades non se poden fraccionar.

4.3. Período de realización: Todas as mobilidades deberán realizarse en datas comprendidas entre o día de publicación da resolución definitiva e o 31 de decembro de 2025. As datas exactas de realización de cada mobilidade serán acordadas entre o/a participante, a organización de acollida e o CMUS Profesional de Santiago.

4.4. Subvención: inclúe as seguintes partidas.

- Viaxe: 309€
- Apoio individual: 127€ por día de mobilidade
- Matrícula: 80€ por día lectivo

4.5. Pagamento da subvención: farase efectiva en dous prazos. O primeiro prazo cubrirá o 80% da bolsa e será pagado antes da realización da mobilidade. O segundo prazo cubrirá o 20% restante e será pagado unha vez o/a participante remate a mobilidade, faga entrega da correspondente memoria obrigatoria e cumprimente a enquisa *EU Survey* recibida no seu correo electrónico.

5. Presentación de solicitudes:

5.1. Prazo: a recepción de solicitudes estará aberta dende o momento da publicación desta convocatoria na web do CMUS Profesional de Santiago de Compostela ata as 23:59 horas do xoves 22 de maio de 2025.

5.2. Forma: as solicitudes deberanse presentar por correo electrónico, enviando a documentación sinalada no apartado 8 da presente convocatoria á seguinte dirección:

erasmus@conservatoriosantiago.gal

Soamente en casos debidamente xustificados poderá presentarse a documentación en formato físico na secretaría do centro.

5.3. Corrección de erros: o venres 23 de maio de 2025 publicarase na páxina web do centro unha listaxe provisional de aspirantes admitidos/as e excluídos/as, xunto coa causa de exclusión. Os/As aspirantes excluídos/as poderán presentar alegacións ou corrixir erros na solicitude ata as 23:59 horas do martes 27 de maio de 2025.

5.4. Resolución provisional da convocatoria: farase pública o venres 6 de xuño de 2025 na páxina web do CMUS Profesional de Santiago de Compostela. A continuación haberá un período de reclamacións de 5 días naturais a contar dende o día seguinte á publicación da resolución provisional.

5.5. Resolución definitiva da convocatoria: farase pública o venres 13 de xuño de 2025 na páxina web do CMUS Profesional de Santiago de Compostela.

6. Proceso de selección de participantes:

6.1. Forma: o proceso de selección do profesorado participante nas mobilidades será un concurso de méritos e unha carta de motivación. Existirán dúas quendas de participación, unha para profesorado pertencente á sección bilingüe do CMUS Profesional de Santiago de Compostela, e outra para todo o profesorado. O profesorado pertencente á sección bilingüe pode presentarse nas dúas quendas, pero no caso de obter praza nunha delas quedará automaticamente excluído da outra. A folla de baremación de ambas quendas pode consultarse no Anexo II desta convocatoria. No caso de darse un empate, o criterio de

desempate será ter maior puntuación nos seguintes apartados (por orde de valoración): D, E, B (quenda xeral); F, G, C (quenda sección bilingüe).

6.2. Órgano seleccionador: existirán dous tribunais. Por unha banda, un comité de valoración das cartas de motivación recibidas, formado por cinco docentes do conservatorio seleccionados ao azar entre o conxunto do claustro. Cada integrante deste comité avaliará individualmente as cartas. A cualificación final será a media aritmética das cualificacións individuais, eliminándose a máis alta e a máis baixa cando entre elas haxa unha diferenza igual ou superior a 1,5 puntos. O profesorado aspirante a participar nas mobilidades non poderá formar parte deste comité. Unha vez avaliadas as cartas de motivación, un segundo equipo de selección será o encargado de realizar a baremación de méritos, sumar as puntuacións e levantar acta da resolución provisional. Este segundo equipo estará formado polos membros do equipo Erasmus+ e un docente máis escollido ao azar entre o profesorado do CMUS Profesional de Santiago.

6.3. Resultados definitivos: a resolución do proceso de selección ordenará aos aspirantes por orde de puntuación, de maior a menor. Na quenda xeral, as posicións do 1 ao 2 darán acceso directo ás mobilidades. Na quenda da sección bilingüe, a posición 1 dará acceso directo ás mobilidades. O profesorado en posicións posteriores quedará en lista de agarda.

7. Requisitos de participación:

R1. Ser profesor/a titular en activo do CMUS Profesional de Santiago de Compostela durante o curso 2024/2025.

R2. Presentar os documentos obrigatorios sinalados cun asterisco no apartado 8 desta convocatoria (D1, D2, D8).

8. Documentación requerida para participar no proceso de selección:

D1*. Modelo de solicitude cumprimentado e asinado (Anexo I).

D2*. Certificado a obter no apartado “Datos persoais” do portal da Consellería de Educación no que consten os anos de antigüidade no CMUS Profesional de Santiago e o destino definitivo do/a docente.

D3. No caso de pertencer á sección bilingüe do CMUS Profesional de Santiago, documento expedido polo conservatorio que faga constar este feito.

D4. No caso de pertencer ao equipo Erasmus+ do CMUS Profesional de Santiago, documento expedido polo conservatorio que faga constar este feito.

D5. Documento, expedido polo CMUS Profesional de Santiago, que faga constar o historial de participación en mobilidades Erasmus+ do/a candidato/a.

D6*. Carta de motivación, cunha extensión mínima de 3000 caracteres e máxima de 5000 caracteres, espazos incluídos, escrita en fonte Arial tamaño 12 e aliñación xustificada. Pódese consultar a rúbrica de avaliación desta carta no Anexo III desta convocatoria.

Os documentos marcados con (*) son necesarios para participar no proceso selectivo e a súa falta causará a eliminación do/a candidato/a de dito proceso. Os documentos restantes, no caso de non ser entregados, causarán a cualificación de cero puntos no apartado correspondente do baremo.

Toda a documentación deberá ser expedida e enviada por medios electrónicos, atendendo deste xeito ao principio básico de sosteñibilidade e responsabilidade medioambiental do programa Erasmus+. A documentación deberá ser enviada por correo electrónico á dirección erasmus@conservatoriosantiago.gal. En casos debidamente xustificadas, o equipo Erasmus+ autorizará a presentación de documentación en formato físico na secretaría do CMUS Profesional de Santiago.

9. Obrigas que adquire o profesorado seleccionado:

Os docentes que resulten seleccionados comprométense a realizar as seguintes accións, de obrigado cumprimento:

- Crear unha conta virtual Europass.
- Asinar a autorización para diseminación de imaxes por parte do CMUS Profesional de Santiago de Compostela.
- Participar nas xornadas de formación previas á mobilidade organizadas polo equipo Erasmus+ do CMUS Profesional de Santiago de Compostela.
- Colaborar na elaboración do acordo de aprendizaxe correspondente á súa mobilidade e asinalo unha vez completado. O acordo de aprendizaxe debe estar asinado polo profesorado participante antes dos 10 días naturais previos ao inicio da mobilidade.
- Asinar o acordo de subvención correspondente á súa mobilidade. O acordo de subvención debe estar asinado antes dos 10 días naturais previos ao inicio da mobilidade.
- Realizar a mobilidade.
- Durante a realización da mobilidade, asistir ás aulas acordadas co centro de acollida e tomar todas as medidas necesarias, en colaboración coa persoa titora, para acadar os obxectivos recollidos no acordo de aprendizaxe.
- Producir material audiovisual (fotografías, vídeos) das aulas observadas e doutros eventos relacionados cos obxectivos da súa mobilidade en particular e do programa Erasmus+ en xeral.

- Cubrir a enquisa *EU Survey* que a/o participante recibirá unha vez completada a súa mobilidade, nun prazo de 30 días contados a partir da recepción da enquisa no correo electrónico.
- Elaborar unha memoria de actividade, cunha extensión de entre 4000 e 5000 caracteres, e remitila ao equipo Erasmus+ do CMUS Profesional de Santiago de Compostela nun prazo de 30 días naturais contados a partir da data de finalización da mobilidade. Esta memoria debe incluír un resumo das actividades realizadas, a aprendizaxe adquirida e o seu potencial impacto na actividade docente do/a participante.
- Participar nas xornadas de difusión posteriores á mobilidade organizadas polo equipo Erasmus+ do CMUS Profesional de Santiago de Compostela.

10. Recoñecemento da mobilidade:

O profesorado participante nas mobilidades recibirá os seguintes documentos que recoñecen oficialmente a actividade realizada:

C1. Certificado de realización do curso de perfeccionamento de lingua inglesa, expedido pola institución de acollida.

C2. Certificado de mobilidade Europass. A expedición deste certificado será levada a cabo polo CMUS Profesional de Santiago de Compostela.

C3. Recoñecemento como horas de formación do profesorado, prevista na resolución do 9 de decembro de 2024 da Dirección Xeral de Centros e Recursos Humanos. Recoñécense un máximo de 60 horas, segundo o programa do curso.

11. Disposicións finais:

11.1. A participación neste proceso selectivo supón automaticamente a aceptación das súas bases.

11.2. Toda a información relacionada con esta convocatoria estará dispoñible na sección *Erasmus+* da páxina web do CMUS Profesional de Santiago de Compostela.

11.3. Todas as resolucións da presente convocatoria publicaranse na sección *Erasmus+* da páxina web do CMUS Profesional de Santiago de Compostela.

11.4. Calquera casuística non contemplada nestas bases será resolta polo equipo Erasmus+ en colaboración co equipo directivo.

En Santiago de Compostela, a 5 de maio de 2024

Asdo,

Manuel López Jorge

(coordinador Erasmus+)